

operatere i osiguravanjem uvođenja i provedbe potrebnih garancija za konkurenčiju. Također treba ojačati kapacitet relevantnih odjela u Ministarstvu transporta i komunikacija.

Nezavisni status RAK-a je dobro uspostavljen, posebno pravna rješenja u pogledu njihove finansijske nezavisnosti i imenovanja njihovog generalnog direktora. Moguće usvajanje nacrta zakona o platama i naknadama, koje bi RAK stavio u okvir državne službe, mogao bi ugroziti nezavisnost RAK-a. Osiguranje nezavisnosti ove Agencije (uključujući zadržavanje njihove finansijske nezavisnosti i poštivanje procedura pri imenovanju generalnog direktora) su od ključnog značaja za razvoj tržišta emitiranja i (tele)komunikacija.

Nije postignut napredak u transformiranju Direkcije sistema zaštite identiteta građana (CIPS) u državnu Agenciju za informacijsko društvo, zaduženu za provedbu Strategije za informacijsko društvo i njenog akcionog plana, kao i koordinaciju aktivnosti iz ove oblasti u cijeloj zemlji.

Napredak je postignut u pogledu **usluga informacijskog društva**. Bosna i Hercegovina je ratificirala Konvenciju o kibernetičkom kriminalu Vijeća Evrope. Zakoni o elektronskom prometu su usvojeni. Zakon o elektronskom potpisu je usvojen u novembru 2006. godine, ali tek treba da se usvoje provedbeni akti. Zakonodavstvo o uslugama uslovljeno pristupa još nije usvojeno.

Izvjestan napredak je postignut na polju **audiovizualne politike i medija**, pogotovo približavanjem zakonodavstva Bosne i Hercegovine Evropskoj konvenciji o prekograničnoj televiziji. Zakon o reklamiranju i sponzorstvu je revidiran u skladu sa tom Konvencijom. RAK je također počeo reviziju Praktičnog kodeksa rada emitera. Međutim, Federacija Bosne i Hercegovine nije bila u stanju usvojiti sve potrebne zakone o javnom emitiranju, te provedba reforme o javnom emitiranju i dalje kasni.

Bosna i Hercegovina nije potpisnica UNESCO-ve Konvencije o kulturnoj raznolikosti. Ratificiranje ove Konvencije je potrebno kako bi Bosna i Hercegovina učestvovala u Programima Zajednice koji se odnose na medije.

Pripreme Bosne i Hercegovine na području informacijskog društva i medija napreduju, ali potrebno je uložiti poseban napor da bi se riješila preostala pitanja usvajanja kompletног pravnog okvira u oblasti javnog emitiranja i uspostavila državna Agencija za informacijsko društvo. Potrebno je postići stvarnu konkurenčiju u sektoru telekomunikacija. Potrebno je sačuvati nezavisnost RAK-a.

4.2.7. Finansijska kontrola

Preduzeti su određeni početni koraci u Bosni i Hercegovini na području javne interne finansijske kontrole (PIFC). U novembru 2006. godine, radna grupa na državnom i entitetskom nivou pripremila je zakon o internoj reviziji za sve nivoе vlasti, ali usvajanje svih relevantnih zakona još nije završeno. U avgustu je formirana druga radna grupa za izradu jedne sveobuhvatne politike PIFC-a kojom se garantira izbalansirani razvoj interne kontrole i sistema interne revizije. Do sada, nisu uspostavljene centralne jedinice za usklađivanje.

Zapažen je ograničeni napredak u pogledu vanjske revizije. Nakon novog zakona o vanjskoj reviziji, usvojenog u 2006. godini, institucije Glavnog revizora Republike Srpske i Federacije

Bosne i Hercegovine imenovale su novo rukovodstvo. Na državnom nivou, imenovanje glavnog revizora i zamjenika glavnog revizora kasnilo je više od godinu dana.

Izvještaji glavnih revizora dostavljaju se relevantnim parlamentima. Iako su bili dostupni širokoj javnosti, nije bilo dovoljno naknadnih aktivnosti po pitanju izvještaja i preporuka Glavnog revizora. Nije bilo napretka u smislu formalizacije koordinacije između ovih tijela kroz uspostavu Stalnog sekretarijata. Uz tri postojeća ureda glavnog revizora i Brčko Distrikt je osnovao svoj ured na osnovu vlastitog Zakona o reviziji, što i dalje fragmentira sistem.

Općenito, napredak Bosne i Hercegovine na polju finansijske kontrole bio je ograničen, i pripreme su još uvijek u ranoj fazi.

4.2.8. *Statistika*

Nije poboljšana saradnja između Agencije za statistiku Bosne i Hercegovine (BHAS) i dva entitetska statistička zavoda. Sporazum iz 2005. godine, osmišljen da ojača koordinacijsku ulogu BHAS-a u usklađivanju metodologija i diseminaciji podataka na državnom nivou, nije u potpunosti proveden. Centralna banka Bosne i Hercegovine i BHAS su potpisali Memorandum o razumijevanju. Sličan sporazum se priprema sa Upravom za indirektno oporezivanje zaduženom za prikupljanje podataka o vanjskoj trgovini od carinskih organa.

Što se tiče klasifikacija, pravni akti su usvojeni za CPA (Klasifikacija proizvoda po aktivnostima). Pripreme se vrše za uvođenje COICOP (Klasifikacija industrijske potrošnje prema svrsi). Sljedeći korak će biti prijenos državnog zakona u entitetske, te provedba klasifikacije, kako to propisuje BHAS na državnom nivou u raznim područjima statistika.

Na području demografije i socijalne statistike, preduzeti su početni koraci na pripremi popisa stanovništva. Priprema za popis stanovništva u 2011. godini treba biti nastavljena pošto nepostojanje podataka predstavlja ozbiljan hendičep za utvrđivanje politika i njihovu provedbu u zemlji. U pogledu statistike rada, organizirana je druga Anketa radne snage.

Izvjestan napredak je postignut u prikupljanju makroekonomskih statističkih podataka. Indeks potrošačkih cijena za 2006. godinu je objavljen. Međutim, još ne postoji kalkulacija BDP-a po stalnim cijenama, a preliminarna procjena ekonomije koja se ne prati unesena je u nacionalne račune. Plan razvoja nacionalnih računa u Bosni i Hercegovini je proveden kada se radi o ovom izvještajnom periodu. Kvartalni računi još ne postoje.

Strukturalna poslovna statistika još uvijek nije zasnovana na poslovnim registrima. Gotovo da nema raspoloživih informacija na nivou države o transportu i turizmu. Isto se odnosi na statistiku o energetici. Statistički podaci o vanjskoj trgovini nisu dovoljno pouzdani iako je bilo određenih poboljšanja, poput uvođenja indeksa cijena uvoza i izvoza.

Bilo je ograničenog napretka u pogledu statistike u poljoprivredi. Većina podataka koji se tiču poljoprivrede se prikupljaju uz korištenje neharmoniziranih metoda, posebno za životinje i proizvodnju mesa. Nema novih informacija o strukturi poljoprivrednog sektora. Započet je rad na prikupljanju agro-monetarne statistike.